



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

## QUÆSTIO MEDICA,

QUOD LIBETARIIS DISPUTATIONIBUS

*manè discutienda in Scholis Medicorum, die Jovis decimo-quarto,  
mensis Februarii, anno Domini M. DCC. XLIII.*

M. NATALE-MARIÆ DE GEVIGLAND,  
Doctore Medico, Præside.

*An functionum integritas à Spiritibus.*

### I.



U M A N U M corpus non malè dixeris machinam  
quamdam ad motus, ususque speciales incredibili arte  
fabricatam, quæ juxta leges & consilia summi opificis,  
accuratâ proportionem, servatis gradibus, distinctoque tem-  
porum ordine in naturalibus actibus procedit: tota con-  
stat ex fibris & tubulis: cor primùm circuitus agens: indefinenti

A

2

sanguinis impulsu ad cerebrum, est spirituum author, quorum copiâ opus suum concitata quæque pars integram edit functionem. Scilicet ut communia partibus omnibus, sic ad omne opus necessaria instrumenta, spiritus horum indoles tenuissima, mobilissima; ut affluunt celeriter, breviter effluunt; nisiq[ue] continuâ instauratione compensentur, tuendæ vitæ, corpori sustinendo impares. Hinc ut alimenti, sic capefcenti somni venit æqua necessitas. Alimento in sanguinem, sanguine in spiritum verso, quod ipsi decesserat corpori, accedit robur, & ligatis impeditisque per somnum sensibus, opposito velut aggere sistuntur spiritus, prohibeturque effluvium. Sic lassum paulo antè, penèque deficiens animal, post somni peracta munia, integrum surgit & vegetum; si quidem plenius uberiusque suis in ergastulis coacervati spiritus, ad officia alacrius redeunt.

## II.

**F**UNCTIONES aliæ independenter à voluntate exercentur, nonnullæ voluntatis nutum sequuntur. Ad has & illas requiritur fibrarum debitus tonus, liquidorum affluxus, liber humorum circuitus. Quò liberius vasa permeat sanguis, eò facilis functio per agitur: quò melius à naturâ disposita organa, eo perfectius proprias functiones edunt; sanguinis circuitus, fibrillarum oscillationis causam, nullus est sanæ mentis qui in spiritus non refundat: spirituum affluxû distenta turget fibra nervea, contrahitur, intumescente ventre, musculus. in motus vermiculares aguntur intestina; cessat jugis ille ad partem spirituum affluxus; languet iners, flaccescunt fibræ, concidunt glandulæ, dividendis & attenuandis humoribus impares succo heterogeneo replentur, crudo humore turgescunt: prima obstructionum origo: à viscido sanguine pituitosisque humoribus referto, quot & quanta mala humanum genus cruciunt; minus liberè tunc per universum corpus distribuuntur spiritus animales. Hinc coquendi difficultas in stomacho, imperfecta bilis in hepate secretio, imminuta vel suppressa insensibilis perspiratio. Quàm longè graviora accidunt incommoda, si nulli in cerebro secernantur spiritus. Affecto sensorio communi, præpedito spiritibus influxu decumbit quasi mortuum animal apoplexiâ percussum brevi, ni citò succurratur, perituum.

## III.

**S**INGULÆ corporis partes diversis muniis obeundis à naturâ destinatæ, tam arctum habent inter se commercium, ut una ab

aliâ in officio pendeat. partes omnes fons nutritius sanguis irrorat & alluit, ipsis nutrimentum suppeditando. A cordè ad extrema corporis pellitur. Sed unde motus cordis, totus pendet à spiritibus, in cerebri medullari substantiâ illi secernuntur. Secreti per proprios canales, nervos dixere, ad omnes corporis partes ruunt, ipsis oscillant, tenduntur, crispantur, convelluntur, contrahuntur, ac retrahuntur fibræ; in motum agitur quidquid oscillat in corpore; pulsant cor & arteriæ; muscoli quot quot sunt moventur. A sanguine diversi liquores per propria secernuntur incernicula, per excretoria superflui excernuntur, crudi coquuntur, crassiores attenuantur. perfectâ tunc gaudet sanitate vegetum animal. Cum autem cessat jugis spirituum animalium influxus, vel violenti motu, diuturno exercitio, vigiliis immodicis spoliatur sanguis: tardo circuitu agitur, vix pulsât cor, flaccida partium omnium substantia, languet effectum animal: corpus jacet iners, nisi spirituum jacturâ restaurentur, citò exiturum.

## I V.

**S**ICUT spirituum fons, sic somni sedes cerebrum, ad secernendas partes sanguinis subtiliores destinatum. has spiritus animales vocant. Ab uno eodemque principio, instar linearum, ducuntur nervi: hoc sensorium commune merito appellares: vivo ac jugi circuitu, musculorum indefinente motu attenuatus divisus sanguis, copiosiorum spirituum materiam suppeditat. Corpus callosum propriis rivulis subeunt spiritus, per nervos postea ad varia organa distribuendi. cum verò sanguis eundo depauperatur, languent functiones: vel si crassis chyli partibus adhuc involvantur, minori copiâ per nervos affluunt: hinc ad munia obeunda impares. tunc languido gradu fluens sanguis, quasi hebetum reddit animal, somnoque obrutum jacet iners. Vacant tunc ab opere organa sensibus externis destinata, cessant functiones animales. partium vitalium fibrillæ spiritibus tunc magis turgidæ, vividius actus suos exerunt; arteriæ validius pulsant: cor contrahitur arctius, ipsiusque alterno motu, arteriarum successivo tritu, magis ac magis dividitur sanguis: partes ipsius tenuiores sic divisæ ac comminutæ, in cerebri glandulas facilius irruunt; quibus per nervos assatim distributis, tenduntur omnes corporis fibræ propriis functionibus de novo exequendis aptæ.

## V.

**R**EFECTIONIS igitur necessaria ratio, somnus, oclusis corporis totius ostiis, ipsius egregie sumptibus parcens. Hæc

de causâ noctes diesque se se vicissim excipientes amavit caduca ventium natura, ut diurnos experta labores, profundo noctis silentio quieti captandæ quasi provocata quiesceret, utriusque vicissitudine vigeret: sic cadente de montibus umbrâ, quasi quiescere montium animal, moveri cessât, ac sensum languentibus partibus sensus otiosi fiunt. Interim natura non alienis distracta rebus, tota domesticis incumbit, ingesta felicius coquit alimenta; unde laudabilis cum sanguine permixtus chylus, mox in spiritus animales elaborandus deferitur, donec sufficienter refarcita natura, ad exteriora de novo propellat: sic quieti succedit motus, qui sopitas partes titillando excitat, humores recreat, partibusque singulis dispensat: his tamen alternis uti animal necesse est: nimio somno languerent partes, si bræque nimis flaccidæ sensationis expertes forent; sed tota vanesceret virtus partium elastica, si immodicis implicatum vigiliis nusquam somni quiete frueretur, dissipatisque continuo viribus fatisceret facultas omnis, rueretque tota animalis æconomia.

*Ergo functionum integritas à Spiritibus.*

' DOMINI DOCTORES DISPUTATURI.

*M. Petrus Lalouette.*

*M. Josephus-Maria-Franciscus de la Sône, Regia Scientiarum Academiæ Socius.*

*M. Petrus-Antonius Lepy.*

*M. Silvester-Antonius le Moine, Eques.*

*M. Julianus Buffon.*

*M. Elias Col-de-Vilars, Consiliarius Medicus Regis ordinarius in ejus Castellato, nec non Saluberrimæ Facultatis Decanus.*

*M. Petrus-Josephus Macquer.*

*M. Petrus Bercher.*

*M. Henricus Besnier.*

Proponbat Parisiis PETRUS CHEVALIER, Rhedonzus, Saluberrimæ Facultatis Medicinæ Parisiensis Baccalaureus, A. R. S. H. 1743. à sextâ ad meridiem.